

每週經課朗誦經文(巴克禮漢羅/教羅)2014/11/16

共同經課 - 1 士師記四章一節~七節

1 Í-hut 死了，以色列人 koh 行耶和華所看做 pháiⁿ ê 事。2 耶和華賣 in tī 迦南王 lâ-pin ê 手，就是 tī Hā-só 做王 ê；伊 ê 軍長是 Se-se-láh，伊 khiā 起 tī 外邦人 ê Hā-lô-siat。3 lâ-pin 王有鐵車九百張；伊大大欺壓以色列人二十年；以色列人就求叫耶和華。4 Hit 時有一個女先知名叫 Tí-pho-láh，是 Láh-pí-to ê bó，伊做以色列 ê 士師。5 伊 khiā 起 tī Í-hoat-liân 山地，Láh-má kap Pek-ték-lī ê 中間，tī Tí-pho-láh ê 棗樹腳；以色列人 lóng 上去伊 hia，受伊判斷。6 伊差人叫 A-pí-lô-am ê kiáⁿ Pa-láh tùi Ná-hut-tha-lī ê Ki-te-su 來，對伊講，耶和華以色列 ê 上帝 kiám-m̄ 是命令講：你 tiòh 去 Tha-pòk 山，chhoā Ná-hut-tha-lī kap Se-pò-lùn 人一萬 kap 你去？7 我 beh hō lâ-pin ê 軍長 Se-se-láh kap 伊 ê 車，伊 ê 全軍，到 Ki-sūn 河你 hia；我 beh 將伊交 tī 你 ê 手。」

共同經課 - 2 詩篇一百二十三篇 or 七十六篇

1 上崎 á ê 詩。1) 坐 tī 天頂 ê 主 ah，我 kiáh 目 ñg 你。2 看 ah，做奴僕 ê 目矐，怎樣 ñg 主人 ê 手，做女婢-ê 目矐，怎樣 ñg 主母 ê 手，阮 ê 目矐亦照 án-ni ñg 耶和華阮 ê 上帝；直直到伊憐憫阮。3 耶和華 ah，可憐阮，可憐阮；因為阮 hō 人看輕，已經到極。4 阮 ê 心 hō hiah-ê lâ-êng ê 人冷笑，Hō 驕傲 ê 人看輕，已經到極。

Or 七十六篇

1 A-sat ê 詩歌，交 hō 樂官；用絲絃 ê 樂器。1) Tī 猶大上帝 hō 人所 bat；Tī 以色列伊 ê 名做大。2 Tī Sat-léng 有伊 ê 帳房，Tī 錫安有伊 khiā 起 ê 所在。3 伊 tī-hia at 折弓 ê 箭，Kap 藤牌、刀劍，以及交戰 ê ke-si。[Sè-láh] 4 你 tùi 搶物 ê 山寨來，有榮光 kap 威嚴。5 心勇敢 ê 人 lóng 受搶劫；in ê 困是長長困；英雄 ê 人，無一個會出手。6 雅各 ê 上帝 ah，你 ê 責備一下發出，車、馬，lóng 困重眠。7 獨獨你是 thang 驚 ê；你 ê 受氣一下發出，chī-chūi tī 你 ê 面前 khiā 能 tiâu ah？8 你 tùi 天裡 hō 人聽判斷；地就驚惶靜靜；9 就是上帝起來審判，Beh 救地上一切謙卑 ê 人。[Sè-láh] 10 人 ê 受氣，的確 hō 你得 tiòh o-ló；其餘 ê 受氣，你 beh 禁止。11 Lín tiòh 對 lín ê 上帝耶和華下願 koh 謝願；四圍 ê 人 tiòh toà 禮物貢獻 tī thang 敬畏 ê 主。12 伊 beh 遏止貴族 ê kiau 去，伊 hō 世上 ê 列王驚畏。

共同經課 - 3 帖撒羅尼迦前書五章一節~十一節

1 兄弟 ah，論到時期，m̄ 免寫 phoe hō lín。2 因為 lín 家已詳細知，主 ê 日到親像賊透暝來。3 人當 teh 講，平安穩當 ê 時，災禍忽然到 tī in，親像生 kiáⁿ ê 艱苦到 tī 有身孕 ê 婦人人一樣，in hiah-ê 人 boē 會走離。4 但是兄弟 ah，lín m̄ 是 tī 暗 ê 中間，致到 hit 日親像賊來 jip-tiòh lín。5 因為 lín lóng 是光明 ê 人，日時 ê 人；咱 m̄ 是屬 tī 暝時 ê，也 m̄ 是烏暗 ê。6 所以咱 m̄-thang 親像其餘 ê 人 teh 困；tiòh 警醒節制。7 因為困 ê 人是暝時困，酒醉 ê 人是暝時醉。8 但是咱屬日時 ê tiòh 節制，穿信 kap 仁愛做護心鏡，用得救 ê ñg 望做頭盔。9 因為上帝定 tiòh 咱 m̄ 是來 tú-tiòh 受氣，就是 beh tùi 咱 ê 主耶穌基督來得 tiòh 救。10 伊替咱死，hō 咱或是醒或是睏，kap 伊同活。11 所以 tiòh 相安慰，大家相建立德行，照 lín 所 teh 做 ê。

共同經課 - 4 馬太福音二十五章十四節~三十節

14 因為親像一人 beh 去外國；就召伊家已 ê 奴僕將所有 ê 交代 in。15 一個 hō 伊銀五千，一個 hō 伊兩千，一個 hō 伊一千；各照 in ê chài-tiâu；就去外國。16 領五千 ê，隨時去做 seng-lí，koh thàn 五千。17 領兩千 ê 亦是 án-ni，koh thàn 兩千。18 獨獨 hit-ê 領一千 ê 去，就掘地，來 khng 密伊 ê 主人 ê 銀。19 過久久，chiah-ê 奴僕 ê 主人到，kap in 算賬。20 領五千 ê 來，koh 帶五千，講，主 ah，你交代我五千；你看，我有 koh thàn 五千。21 伊 ê 主人 kā 伊講，好 ah，好 koh 盡忠 ê 奴僕，你 tī 少(chió)ê 已經盡忠，我 beh 設立你來管 choē-ê；thang 入你 ê 主人 ê 快樂。22 領兩千 ê 亦來，講，主 ah，你交代我兩千；你看，我有 koh thàn 兩千。23 伊 ê 主人 kā 伊講，好 ah，好 koh 盡忠 ê 奴僕，你 tī 少 ê 已經盡忠，我 beh 設立你來管 choē-ê；thang 入你 ê 主人 ê 快樂。24 領一千 ê 亦來，講，主 ah，我知你是嚴核(hát)ê 人；bē 掖 ê 所在，就 beh 收割；bē 分散 ê 所在，就 beh 捨做堆。25 所以我驚，就將你一千銀去 tãi tī 地裡；taⁿ 你 ê 原物還你。26 伊 ê 主人就應伊講，Pháiⁿ koh pîn-toāⁿ ê 奴僕 ah，你既然知我 bē 掖 ê 所在，就 beh 收割，bē 分散 ê 所在，就 beh 捨做堆。27 就 tiòh 將我 ê 銀 hē tī 錢店；我來 ê 時 thang 得 tiòh 我 ê 本銀 kap 利息。28 所以 tiòh tùi 伊 thèh hit 一千，來 hō hit-ê 有十千 ê。29 因為見若有 ê，beh hō 伊，hō 伊有 chhun；無 ê，連伊所有 ê，亦 beh thèh 伊。30 亦 hit-ê 無利益 ê 奴僕，趕伊 tī 外面烏暗 ê 所在；tī hia beh 有啼哭，咬牙切齒。